

Powšitkowne WOZJEWJENJA

njedźelu, 25. septembra 2022

Wusyłanje Božeje mšě

Serbskorěčnu Božu mšu móža wěriwi tutu njedźelu, 25. septembra, w 9.00 hodź. znowa z Chrósćic jako livestream scěhować. Link na nju je w interneće pod www.posol.de a na wosadneje stronje podaty.

Nyšpor z požohnowanjom konjacych zapřahow

Towarstwo Cyrila a Metoda z.t. přeprašuje wšitkich wěriwych tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 25. septembra, w 14.00 hodź. w Chrósćicach na łuce při Hatkach.

Běh wo pokal zbóžneho Alojsa

Towarstwo Cyrila a Metoda z.t. (TCM), Sportowa jednotka 1922 Radwor kaž tež tamniši młodźinski klub přeprašuja sportowcow wšěch starobnych skupin wot šěsć lět na běh wo pokal zbóžneho Alojsa do Radworja, a to pónđzelu, 3. oktobra. Započatk za wšitkich běharjow je w 9.00 hodź. na sportnišću. Woni móža mjez scěhowacymi čarami wolić: 500, 1.000, 1.500, 2.000, 4.000 a 6.000 metrow. Zajimcy měli so online přizjewić. To je jeničce pod www.posol.de móžne.

Předstajenje spěwohry

Swoju premjeru změje nowa serbska spěwohra „Z TOBU – Bohu swjećene lěto“ pjatk, 21. oktobra, we 18 hodź. w Chrósćanskej wjacezaměrowej hali „Jednota“. Dalše předstajenja su planowane sobotu, 22. oktobra, tohorunja we 18 hodź. a dwójce njedźelu kaž tež pónđzelu, 23., 30. a 31. oktobra, stajnje w 16 hodź. na samsnym městnje. Wšitke předstajenja poskiča so ze simultanim přeložkom do němčiny. Na popołdnišich předstajenjach poskići so zdobom dźiwadłowa pěstowarnja za dźěći wot dweju do šěsć lět. Za to zběra so přinošk we wysokosci 3 eurow na dźěćo. Zajimcy měli so z mejlku na don.boskowy-dom@t-online.de přizjewić. Kartki za jednotliwe předstajenja předawaja so pola časnikarja Jürgena Njeka w Chrósćicach abo online. Link k tomu je pod www.posol.de wozjewjeny.

Na swětowe zetkanje młodžiny do Lissabona

Drježdžansko-Mišnjanske biskopstwo přeprašuje młodostnych a młodych dorosćenych wot 16 do 35 lět, sej klětu w lěću na swětowe zetkanje młodžiny do portugalskeje stolicy Lissabona dojeć. Do toho je wobdźělenje na dnjach zetkanja w Portoskim biskopstwje planowane. Jězba wotměje so wot pónđzele, 24. julija, do wutory, 8. awgusta 2023. Serbska skupina budže při tym dźěl diecezanskeje skupiny. Nadrobniše informacije su pod www.posol.de wozjewjene.

Duchowny oratorij znowa zaklinči

Na předstajenje duchowneho oratorija „Israelowa zrudoba a tróšt“ Korle Awgusta Kocora su zajimcy sobotu a njedźelu, 1. a 2. oktobra, w 17 hodź. do Budyskeje Marije-Marćineje cyrkwy přeprošeni. Zarjadowanje wotměje so we wobłuku Lěta Zejlerja a Kocora. Pod wumělskim nawodom dirigentki Judith Kubicec spěwaja chóry Lipa, Meja a Serbskeho ludoweho ansambla (SLA) kaž tež studentski cyłk. Orchester SLA jich z hudźbnikami Sinfonietty z Drježdžan přewodźuje. Zdobom wustupja solisća Romy Petrick (sopran), Britta Schwarz (alt), Patrik Horňák (tenor) a Clemens Heidrich (bas). Twórba zaklinči w orchestralnym wobdźěłanju Stefana Malzewa.

Modlerske zetkanje za biskopstwo

W klóštrje Marijinej hwězdze w Pančicach-Kukowje wotměje so njedźelu, 9. oktobra, modlerske zetkanje za Drježdžansko-Mišnjanske biskopstwo. Wone steji pod hesłom „Symanje, lubuješ mje?“ (Jan 21). Po witanju w 13.30 hodź. přizamkne so w 14 hodź. modlenje wo duchowne powołanja w klóšterskej cyrkwi z biskopom Heinrichom Timmereversom. Po tym su wobdźělnicy na wzajomnu wuměnu při přikusku přeprošeni.

Praski chór spěwa w Ralbicach a Róžeńće

Cyrkwinski chór Cantus amici z Prahi wuhotuje njedźelu, 16. oktobra, Božu mšu we 8.30 hodź. w Ralbicach. Samsny dzeń w 16 hodź. da česki chór koncert w Róžeńčanskej swjatnicy. Zastup je darmotny. Na kóncu přewjedže so kolekta.

Pytaja cyrkwinskeho hudźbnika

Kulowska katolska wosada Marije donjebjeswzaća pyta wosobu, kotraž by po móžności hnydom hłownohamtsce městno cyrkwinskeho hudźbnika přewzała, poprawom 40 hodźin wob tydžeń, wo mjenje hodźi so jednać. Při tym jedna so wo zastup za čas staršiskeho časa. Tohodla je městno najprjedy jónu hač do klětušeho 31. awgusta wobmjelowane. Štóž ma zajim, měł so pola fararja dr. Wolfganga Křesáka, Cyrkwinske naměsto 1, 02997 Kulow, přizjewić. Nadrobne wupisanje je pod www.posol.de wozjewjene.